



F

III

18/
h

37 28/B/F III

18/h

MORTON, R.

Part of his
opera medica

pt. 6

191 (41)

GUALTERI HARRIS

MED. DOCT. CELEBERR.

Coll. Med. Lond. Socii atque Censoris ,

OBSERVATIONES

DE

MORBIS ALIQUOT GRAVIORIBUS.

Cum DISSERTATIONE DE LUIS VENEREÆ
Origine , natura , & curatione

Quibus subjunctus est

VINCENTII KETELAER

DE

APHTHIS BELGARUM COMMENTARIUS.

EDITIO NOVISSIMA.



GENEVÆ,

Sumptibus PERACHON & CRAMER.

M. DCCXXVII.

REV. J. A. R. R. R.

THE REV. J. A. R. R. R.

THE REV. J. A. R. R. R.

THE REV. J. A. R. R. R.

THE REV. J. A. R. R. R.

THE REV. J. A. R. R. R.

THE REV. J. A. R. R. R.

THE REV. J. A. R. R. R.

THE REV. J. A. R. R. R.

THE REV. J. A. R. R. R.

THE REV. J. A. R. R. R.

THE REV. J. A. R. R. R.

THE REV. J. A. R. R. R.

THE REV. J. A. R. R. R.



THE REV. J. A. R. R. R.

THE REV. J. A. R. R. R.



GUALTERI HARRIS

MED. DOCT. CELEBERR.

Coll. Med. Lond. Socii atque Censoris,

OBSERVATIONES

DE

MORBIS ALIQUOT GRAVIORIBUS.



MORBORUM gravissimorum paucas aliquot curationes, quæ fortè Lectori haud displicebunt, aut quæ non planè inutiles erunt, adjicere lubet. Quod si paucæ sint, quas recenseo, observationes, sanè minus erit temporis dispendium, neque Lector diu bonas horas malè collocabit. Convivium Medicum, multiplicium Observationum apparatus instructum, quod voracem helluonum litteratorum appetitum plenius saturare potest, liberum sit aliis copiosius exhibere, scilicet quibus aut otium placet tam laudabile, aut immensi adsunt scientiarum thesauri, aut quibus denique aliis tam facile sit morbos quoslibet averruncare, quàm muscas interficere, vel fabulas narrare. Tenuitati nostræ in præsentia sufficit frugalis & Philosophicus apparatus. Neque etiam prorsus contemnenda est mensa sobria & perparca, eaque Medicis potissimum, qui in omni re solent modum aliis imponere, regulasque inanitatis conservandæ rigidas ac temperatas ferè tradunt. Nec facile ferre possum, ut è memoriâ meâ id unquam elabatur,

batür, quod inter colloquendum cum doctissimo è nostris Medico ab ejus ore aliquando excidit. Nempè illum, qui de republicâ Medicâ optimè meruerat, & qui plurimorum morborum curationes scriptis suis eruditis fusiùs docuerat, equidem semel seriòque percontabam, quamobrem ille de morbis Capitis nihil unquam in lucem emisisset, qui de tot aliis morbis tam feliciter, & cum plausu universo priùs scripserat: respondit Vir integerrimus, *id propterea factum fuisse, quoniam illos morbos curare non potuit.*

Idcirco an Ars Medica conjecturalis, ut aiunt, & quodam modo incerta sit, & in omnia sæcula semper fuerit; an ità constitutum sit generi humano, misero, improbo & scelesto, à Supremo rerum omnium & Sapientissimo Rectore, ut pœnas debitas, morborum diversorum & quandoque incurabilium castigatione, mortales persolvant; an humanum sit, & penè necessarium, plùs minùsve errare; an denique veritati rerum naturalium, & maximè medicarum, densè tenebrę semper obducantur; sapientum judicio & determinationi relinquendum arbitror. Sin perfectæ, & consummatę ægritudinum curationes, quæ nunquam frustrabuntur, rarò innotescant, & tantummodò desiderentur, tanta est hominum ægrotantium, tanta circumstantiarum diversitas, tanta ejusdem hominis in disparibus ætatibus dissimilitudo; saltem voluntatem, & studium aliis benefaciendi, candidus & sciens Lector æqui bonique consulat.

OBSERVATIO I.

De Epilepsiâ.

PUella formosa, undecim annorum, sanguineiq̃ue temperamenti, Epilepticis paroxysmis gravissimis, & maximè diuturnis affecta, Decembris decimo octavo, anni 1701. consilium meum postulabat. A sex mensibus proximè elapsis duos paroxysmos vehementes quotidie sustinuerat, quorum uterque illam per duas vel tres horas ita convellebat, ut viris aliquot robustis plerumque opus esset manus pedesque Epilepticę puellę videtere, nè sibi nova mala ex verberibus & contusionibus tunc temporis accerferet. Præter illos majores, & regulares paroxysmos, alios in dies leviores, facilèque fugaces frequenter habuit; quotiescunque scilicet aut sternutare illam contigerit, aut quoties casus aliquis repentinus, terrore forte injecto, illam faceret expavescere. Paroxysmus verò hujusmodi fuit: cadebat primò quasi exanimis in terram, aut lectum, undè morbus vulgò nuncupatur Caducus, & postquam motus expers paulisper manserat, artus huc illuc magnâ vi & molimine contorquebat, ut manibus sibi alapas impingere possit. Caput sæpè in spasmis deorsum flectebat, & tanto rursum robore retrò tundeat, ac si occiput cuiuspiam illidere, & confringere moli-

moliretur. Oculi torvi undiquaque volvebantur; & spuma ex ore tandem profluebat. Triste denique fuit, horrendumque spectaculum. Morbus meritò Sacer dicitur, sive ob magnitudinem suam, quandoquidem magna apud Veteres Sacra dici consuevère; sive ob difficillimam ejus curationem, qui non humanâ ope, sed solummodò divinâ, credebatur posse tolli. Huic virgunculæ à primâ morbi invasione, etsi nonnunquam sternutaret, tamen nares fuerunt semper siccae, meatusque earum occlusi, & nulliscrementis squalentes, adeò ut nullus omninò mucus, durante ægritudine, è Capitis aut Cerebri glandulis exstillans per ista emunctoria abstergeretur. Similiter volæ manûs incendio interno exarescebant ab initio primo paroxysmorum, neque unquam ex perspiratione salubri humidæ sunt repertæ.

Post quamplurima medicamenta ruri successu nullo, incassumque administrata, præscripsi ei pulveres insequentes, quorum unum sumebat bis in die, in cochleari Julapii Cephalici, superbibendo ejusdem, quâque vice, cochlearia tria.

Rz. Lumbric. terrestr. pp. ℥j. cranii human. pp. ℥ij. cardamom. min. ℥ij. M. F. Pulvis tenuissimus in chartas xij. distribuendus.

Rz. Aq. ceras. nigr. flor. tiliaë ā ℥b. ss. pæon. comp. ℥ij. tinct. castor. ℥ij. syrup. pæon. comp. ℥ij. M.

Sed quia tantam pulveris nauseabundi quantitatem ventriculus fastidiebat, paulò post singulas doses, Elixir Proprietatis dulcis guttas triginta, sacchari tantillo instillatas, insuper mox deglutiebat. Pro delicatioribus nausea, & gustus medicamenti ingratus potest immutari, aut palliari, olei nucis moschatae Chymicæ guttis aliquot saccharo commistis, pulverique priori additis, aut ambrâ griseâ saccharo admistâ; an verò remedium idcirco præstantius, an fuerit deterius, haud certò nobis constat.

Secundo die quo pulveres illos sumebat, paroxysmi ex binis in singulum quolibet die reducebantur.

Quarto circiter die cœpit multum incalescere, & febrili quâdam effervescentiâ corripì; quamobrem sanguinis uncias septem è cephalicâ dextrilateris detrahi imperavi; unde vehemens ille fervor protinus propulsabatur: nec non paroxysmi epileptici intrâ septimanam à primo pulverum haustu penitus evanescabant. Calor autem febrilis modò descriptus, maturationem humorum impurorum in ventriculis cerebri anterioribus, aut inincipite vicino, ad futuram expulsionem, ut videbatur, designabat. Nam sub finem primæ septimanæ duo phænomena memorabilia, eaque saluberrima, se ostendebant. Primò Nasi meatus, sive ductus excretorii, per quos tanta mucii copia sæpè in sanis vulgò transmittitur, & qui tam diu tamque densè occludebantur, sub finem primæ illius septimanæ ita pandebantur, ut circiter selibra mucii, aut purulentia cum sanguine striata è naso profluens emungeretur, tanquam si abscessus aliquis in cerebro ruptus viam sibi expediisset. Secundò volæ manûs tamdiu torridæ & arefactæ, madore miti & salubri perfusæ tactui sentiebantur. Quò protinus factum, ut sternutatio in posterum contingens nullas amplius molestias, nullas

nullas caduci morbi accessiones progigneret. Exindè omnis intumescencia vultûs, quæ diligenter conspicienti prius animadversa est, omninò disparuit, neque terror ex quâcunque levi causâ ampliùs pavidam percellerat. Consului, ut hæc puella aliquamdiu persisteret in repetendis ejusmodi pulveribus, illosque postea iteraret tribus diebus ante aliquot novi & plenilunia; ut & Fontanellas sub utroque crure aperiri curaret, & nulli omninò paroxysmi Epileptici ab illo tempore hætenùs redierunt.

O B S E R V A T I O I I.

De Paralyfi.

UXor Tribuni militum, ferè quadragenaria, sub initium Martii, anni 1693. (cùm gelu admodùm intenso tellus rigeret, & cùm primùm mandata Regia acciperem, ut Majestati suæ ad imperandas Fœderatas in Belgio copias proficiscenti servirem) Paralyfi in omnibus artubus, tam superioribus quàm infimis, corripiebatur. Nè digitum quidem utriusque brachii ad se sustentandum flectere potuit, atque in lecto supina recubabat, motu omni membrorum destituta. At verò Caput, tanquam arx, & propugnaculum inexpugnabile, urbe reliquâ captâ, & ab hostilibus morbi copiis occupatâ, sui juris & ab omnibus functionum læsionibus liberum permanebat; adeò ut valeret Domina clarè permulta proloqui. Veruntamen in tanto ac tam immani affectu, an Lingua Muliebris, propterea quòd ab omni mendacio enarrando, aut confingendo per totam vitam, tantam immunitatem & privilegium præ aliis corporis partibus meritò consequeretur, ut neque silentio ingrato, neque titubationi ineptæ damnaretur, cùm torpor languidus reliqua omnia membra prehendisset, nunquam ego exploravi aut anxie perquisivi.

Paralyfis hæc fuit universalis, & penè Apoplectica, omnibus illis nervis, qui è vertebri medullæ spinalis prodeunt, & per truncum artusque corporis disseminantur, debitâ suâ tensione relaxatis; illisque solummodò nervorum conjugationibus à malo immunibus, qui à medullâ oblongatâ originem ducentes Capitis functionibus inserviunt. Rarissimè quidem hoc genus Paralyseos contingit, quàm Hemiphlegiæ, & partium peculiarium alterutrius lateris impotentia paralytica frequentius obveniant.

Huic Dominae imbecillæ ita paucis hujusmodi medicamentis suppetias tuli, Numine Divino favente, ut illa paucos post dies digitis suis inter cibandum modicè uteretur, & decimâ die ab ingressu meo eam ancillâ leviter sustentatam cubiculo obambulare viderim, priusquam id temporis in Belgium transfretarem.

Rz. Terebin. è Chio ℥iij. solve in vitello ovi recentis immiscendo syrup. de stœchade ℥j. aq. lact. alexit. ℥iv. M. F. Potio.

Rz. Ca-

R. Castor. opt. gr. xv. confer. flor. salviæ ðij. syrupi pæon. comp.
q. s. M. F. Bolus.

Sumebat illa haustum illum terebinthinatum quatuor matutinis insequentibus, ac deindè nè ventriculus nimiam nauseam contraheret, alternis aliquot matutinis temporibus; Bolum verò singulis noctibus.

Notandum verò post haustus illos aliquoties propinatos, Dominam ægrotantem affirmasse, flatum quendam dolorificum, morbi procul dubio causam proximam, quicquid de humore nervis irriguo vulgò determinatur, à superioribus spinæ vertebra magis magisque deorsum impelli, tanquam si fuste quodam [ut loqui amant] flatus videretur detrudi; & sensim, prout flatus ille per spinam descendebat, haustu terebinthinato repetito semper inferius depulsus, toties remisisse Paralyfin, & vires ejus fuisse magis magisque redintegratas. Notandum etiam Terebinthinam pro miris facultatibus flatus discutiendi, quibus pollet (in quâcunque corporis parte flatus fortè includantur, & subtili ac penetranti suâ vi introitum in vias humoribus impervias facilius quàm regressum suum faciant) inter celeberrima medicamenta Carminativa annumerari oportere. Dedi nonnunquam Terebinthinæ Venetæ ʒvj. vel ʒj. (& tantam ejus quantitatem Veteres vulgò adhibebant) in haustu similiter dissolutam, non modò in Paralyticis, verùm & in Arthriticis & Rheumaticis affectibus, cum optimo successu; sed in hoc postremo morbo venæ-sectio bis vel ter repetita ejus usui debet anteire.

Propter hanc Terebinthinæ vim carminativam, idcirco etiam Balsamum Sulphuris terebinthinatum tanti, in Paralyfi medendâ, meritò æstimatur, ut Medici in Nosocomiis id plurimi faciant, quanquam guttarum ejusdem Balsami duodecim exigua, & perminuta vulgò dolis est plerumque causa, quòd auxilium solummodò exiguum & imbecillum ferat. Sed & spiritus terebinthinæ, ex quo conficitur Balsamum, brevi ac fugaci facultate præditus, atque è ventriculo in intestina citissimè transiens, tantam aut tam diuturnam impressionem nervæ ventriculi tunicæ, & consecutione quâdam ceteris corporis nervis è spinâ oriundis nequit efficere, quantam tenax, permanens, & balsamica ipsius Terebinthinæ facultas potentius & efficacius potest. Atqui non est tam facile exponere, quàm verum est affirmare, flatus in corpore pervagantes esse imediatam & proximam causam tum dolorum multiplicium, qui miseros excruciant, tum hujus morbi quasi anodynii & insensibilis, stupore potius quàm dolore noti & insigniti. Theoria flatuum per corpus volitantium, nobis adeò abdita & incognita videtur, ut ventorum turbulentorum natura, (cum in aëre nonnunquam fragore magno tonitribusque bella quædam gerant,) est ardua quidem & difficilis speculationi Philosophorum. Sanè quantasque procellas, & fluctuum jactationes ab imo mari usque ad cœlos ventii interdum suscitant, quantos tremores & terræ motus venti in penetralibus terræ conclusi solent nonnunquam excitare, tanta aut istiusmodi tormina, cruciatus, & convulsiones, flatus in corpore humano geniti, & conclusi cient.

OBSERVATIO III,

De Diabete.

Mercator opulentissimus, annos septuaginta septem natus, mense Decembri, anni 1701. per quinque dies integros, suppressione urinæ totali laborabat, ut nè guttam quidem, durante illo tempore, exstillaret.

Die mensis septimo, post varia medicamenta & evacuationes universales, à me, alioque Medico inclyto priùs frustra adhibita, Cataplasma sequens umbilico ægrotantis tandem applicari iussimus.

℞. Sapon. nigr. ʒvj. croc. opt. ʒß. sal. succin. gr. xv. M. F. Catapl.

Proximo die fontes urinarii, obstaculis perruptis, aperiebantur, & diluvium quoddam urinæ exundans succedebat, adeò ut illâ vesperâ Cataplasma protinùs submoveri mandarem, & pro sene venerando anxius timerem, nè morbus priori contrarius, nempè *Diabetes* compareret.

Die nono nullus dubitandi locus relictus est; etenim signa *Diabetis* pathognomonica se ostendebant. Lotium sine modo, & fere sine intermissione continuò reddebat, sitisque fuit inexplebilis, tanquam si Dipside venenatâ fuisset morsus. Sed potùs copia quantacunque lotio non respondit, neque quisquam sic affectus à potu aut mictione se tantillum inhiberi patitur. Fuerunt qui urinæ illius dulcedinem melleam gustare dignabantur. Ipse de morbi genio & dignotione, sine urinæ gustu, satis persuadebar. Sed hìc commodè occurrit excreta gustandi occasio idonea, si adesset *Xenocratis* discipulus, aut si *Xenocrates*, famosus olim Medicus, in vivis esset, qui nulla medicamenta ægrotis exhibebat, nisi ex urinarum & stercoreum sordido immundoque tribu fuerint deprompta. Iste omnium ægrotantium, ut fertur, urinas & fœdissimas fæces prægustabat [aut prægustare saltem merebatur] quò meliùs de morbis sententiam ferret, & quò certiùs judicaret, quorum animalium excrementa ex domestico suo sterquilinio, aut promptuario pharmaceutico, seligeret & propinaret.

Ægrotans Dominus fuerat priùs carnosus & valdè succulenti, quanquam senex, temperamenti; sed carniùm & musculorum omnium velox fuit colliquatio ab hoc morbo. Die mensis decimo quinto, ex obeso macilentus, ex corpulento penè strigosus factus. Nam omnes corporis succi per canales urinarios tunc maximè patulos torrente quodam profluebant. Cum liberi & nepotes omnes numerosæ suæ familiæ cum amicis & consanguineis, conclamato ægros valedicturi, id temporis convenirent; post varia medicamenta confortantia, post theriacalia, aliaque incassum adhibita, in mentem mihi venit hoc urinæ profluvium immodicum fuisse quamdam veluti Diarrhœam aut fluxum meatuum urinariorum, sicut aliud illud Diarrhœæ

thææ genus est intestinorum proprium, per alvum eodem impetu derivatum, & carniū omnium colliquationem eandem produciens.

In deplorato hoc casu Senis ornatissimi, experiri placuit Rhabarbari polychresti, innocui, & senili ætati quemadmodum infantili maximè congrui & accommodi, vires egregias, an in profluvio renali illud equè conduce-
ret, ac in fluore intestinali solet. Etenim morbus uterque non videbatur multum absimilis, quandoquidem sola fuerit locorum affectorum discrepan-
tia, & *Diarrhæa sit quasi Diabetes alvi, Diabetes renum Diarrhæa.*

Sic itaque præscripti, Medico altero haud refragante:

℞. Rhei elect. incis. ℥ss. santal. alb. citrin. ā ʒj. cardamom. minor. ʒss. M.
Infundantur lento igne, in vase clauso, in vin. Canarin. opt. lbj.

Sumpsit ægrotus hujus Vini colati cochlearia sex, horâ sextâ matutinâ insequenti, die Decembris decimo-sexto, atque tantundem repetebat horâ decimâ antemeridianâ. Quis verò hujus Vini Medicati fuerit effectus! Cer-
tè Seni tam miserè languescenti, etsi ante illum diem continuus urinæ ef-
fluxus tanquam rivuli cujusdam, per vias urinarias fuisset, tamen ab illo
meridie usque ad decimam vespertinam, Diabetes penitus sistebatur, nullum
mingendi desiderium eatenus habuit, sitire protinus desuit, & eodem haustu
tribus vel quatuor matutinis iterato, è gravissimo hoc morbo perfectè con-
valuit.

De aquis mineralibus *Bristolensibus* quantum in hoc morbo prosint, &
quantam existimationem meritò sint assecutæ, jam vulgo, & idiotis inno-
tescit. Sed & aquæ illæ celeberrimæ in pluribus aliis languoribus, ac de-
bilitatibus, præterquam illis renum, famam & existimationem optimè me-
rentur, valetudinem infirmam insigniter roborant, & sitim in Diabete exortam
præ aliis omnibus celerrimè extinguunt. At verò mihi videntur aquæ universę
minerales juvenili & constanti ætati, magis quam senili, & potissimum de-
crepitæ accommodari. Quippè vinum Burdegalense, aut consimile, Senum
fluoribus potentiùs & aptiùs, quàm aquæ quælibet medicamentosę, pro-
cul dubio medebitur.

OBSERVATIO IV.

De raro exemplo Vulneris Pulmonum.

C Apitaneus quidam ferè quadragenarius, incola *Westmonasteriensis*, in mo-
nomachiâ, sive pugnâ singulari, quam cominùs habuit, sub initium
Februarii, anni præteriti, fuit pectore transfixus, & grave vulnus subter
mammam dextram accepit. Sic verò Honor, salute longè charior, in cul-
mine suo acuto & supremo resplendebat, sic Dignitas conservata cum pur-
purâ nobilissimâ tincta. Quippè Philosophos tantummodò decet injurias as-

Harris de Morbis aliquot Gravioribus.

B

pernari,

pernari, & credant Philosophi, si ita placet, *spretas injurias exolescere*; sed res militaris contrarias tradit regulas, sciuntque viri manu prompti, quàm pulchrum sit de quâvis offensusculâ acriter digladiari, & quantum præstat id aëreo ac campestri honoris cubili quàm plumeo & vulgari occidere. Nam *Cælo tegitur qui non habet urnam*.

Duorum Chirurgorum peritissimorum curæ, vulnere percussus sese committebat, qui vulnus acceptum sat citò, si non præmaturè, consolidabant. Nam paulò post, cùm omnia in tranquillo viderentur, procella quædam improvisò exorta est, & abscessu in pectore rupto magnam puris copiam cum sanguine striatam evomebat.

Post septem septimanas à vulnere primùm inflicto equidem accersitus, illum lecto incarcerationum deprehendi, quanquam pulsus fortis & regularis fuit, vox clara, & vultus instar sanorum conspiciebatur. Illicò quæsi, cur lecto interdium non exurgeret, qui neque febre, neque vulnere videbatur coactus in lecto procumbere? Respondit, neque vires deesse, neque voluntatem ad surgendum, sed quotiescunque se erigeret in lecto, aut ad vestiendum, aut comedendum, paroxysmus tussendi pertinax ac diuturnus statim oriebatur, cujus violentiam & molestiam vix tolerare potuit; periculum tamen paroxysmi sese extemplò erigens, coram me fecit, & gravissima deindè accessio tussendi contingebat, circiter horam quâque vice solita permanere. Durante tussis paroxysmo, integram pituitæ & purulentæ cujusdam libram paulatim exantlabat; idque, ut agebat, toties quoties paroxysmum subiit. Porro striæ aliquot sanguinis exiguae, à violentiâ tussis, inter excreationes pituitæ miscebantur; atque dolor in parte vulneratâ nonnunquam sentiebatur.

His visis, equidem arbitrabar, inferiorem Pulmonum lobum diaphragmati adhæsisse, ex ichore aliquo vulneris residuo, aut sanguine incrassato, aut mucosâ pituitâ agglutinativam vim acquirentibus, nimirum à præproprio aut immodico Narcoticorum & Adstringentium usu. Quamdiu enim supinus decumbebat in lecto, à molestiis omnibus liber, & perturbationis expers permansit æger, nullo pondere premebantur pulmones, sed quamprimùm se erigeret in lecto, pulmo pristino motu libero privatus, & deorsum ductus, onere præternaturali opprimebatur. Hanc connectionem partium inusitatam, abscessus prædictus viscositate suâ posse gignere videbatur, & attenuantia medicamenta Narcoticis contraria indicare.

Et cùm neque Balsamica, neque Pectoralia, neque etiam Spirituosa, quicquam conducere tollendæ causæ citò observarem, & cùm tantam illuviem pituitæ viderem tussi exantlatam, Diætam exsiccantem hujusmodi præscripsi, cùm Prognostico, si quid illi spei ex medicamentis quibuscunque affulgere possit, ex hoc potu, temporis progressu, indubitatè expectaretur:

℞. Rasur. lign. guaiac. ℔ss. sarsapar. incis. ℥iv. chin. nodos. incis. ℥ij. santal. alb. citrin. ā. ℥ss. infund. in aq. font. ℔. xij. per xv. horas. Deinde coq. in vase dupl. lento igne, ad tertiæ partis consumptionem; addendo inter coquendum passul. major. incis. ℥iv. & sub finem coctionis glycyrr.

cyrrh. ras. ℥ij. Coletur, & depuretur per subsidentiam. Bibat lb ij. vel paulo amplius quotidie.

Eventus fuit, quod paucos post dies lecto exsurgere valeret, tussi immunis; & intra duas septimanas, sanitati perfecte restitutus horro obambulare. Veruntamen persistebat paulisper, meo monitu, in usu potus Diætetici, nè recidivam aliquam pateretur.

OBSERVATIO V.

De Lumbricis Variolas progredientibus.

Filius natus maximus Ornatissime Viduæ, undecim annos natus, in Junio, ætatis penultimæ, Variolis laborabat. Cum primum illum inviserem, febris fuit peracuta, pulsus celer & vermiculans, ventriculus nauseâ affectus, anhelitus difficilis; de nullo tamen dolore rogatus querebatur, quoniam caput stupore ingenti fuit detentum, usque adeo ut penè elinguis esset, & adstantes nullos cognosceret. Pustulæ rubræ paucæ erumpere in facie incipiebant. Sed post operationem Emetici illius mitis, ac tutissimi, nempe radicis Ipecacuannæ, omnia in melius versa proximo mane multum remittebat febris, anhelatio sublata, & gravibus omnibus symptomatis solutus est; adeo ut variolæ protinus mites, satisque distinctæ, sine discrimine procederent.

Die duodecimo à primo morbi insultu, febre secundariâ prorsus immunis fuit, & extra discrimen omne videbatur constitui; adeo ut parentem admonerem, me ante dies alios quatuor elapsos non amplius rediturum, nisi inexpectatum aliquod symptoma ante tempus destinatum præsentiam meam requireret. Sepositis igitur, aut intermissis medicamentis, jussi, ut solummodo haustulum vini Canarini reperfacti bis quotidie sumeret. Die verò morbi decimo quinto, nuncius mihi properanter accessit, obnoxie rogans, ut puerum hunc moribundum, nullâ interpositâ morâ, protinus inviserem. Adventans eum reperi febre acutissimâ correptum, pulsu undulante & formicante, anhelitu difficili, & torminibus ita exquisitis excruciatum, ut ingentes clamores continuo tolleret. Præterea duos Lumbricos rotundos vivos, vino illo perturbatos rejecerat, alterum vomitu, alterum verò sede. Quo indicio me commonefaciente, plures alios Lumbricos tam gravia symptomata posse comparare conjectans, statim præscripsi salis mirabilis, salis cathartici amari ā. ℥ij. in aq. font. reperfact. ℥vj. solvendas, & quamprimum exhibendas. Porro ol. nuc. mosch. per express. ℥j. instar Cataplasmatidis, umbilico adhibendam.

Insequenti mane rediens, procellam planè sedatam & tranquillitatem novam stabilitam inveni. Quocirca febris omnino profligata est, tormina

confopita, pulsus sanorum similis, & facile respirabat. Denique à nutrice audiebam, infinitum, & penè incredibilem filamentorum quorundam, aut vermium minimorum numerum per sedes, quas paulò antè copiosas habuit, fuisse expulsum.

Quamobrem nè novi tales tumultus in posterum ab aliis Lumbricis contingerent, & quia tempus purgandi commodum appropinquabat, præscripsi Bolum sequentem, vesperi illo exhibendum, & mane proximo hauustum catharticum, repetendos tertio quoque die, ad quintam usque vicem.

℞. Semin. hyperic. ℥j. femin. santonic. agaric. troch. ā. ℥ss. syrup. de absin. q. s. M. F. Bolus.

℞. Rhei elect. agaric. opt. ā. ℥ij. follicul. senn. mund. ℥j. femin. hyperic. ℥ss. fol. thym. satureiæ sicc. ā. p. j. tartar. alb. crud. ℥ij. Inf. & coq. in aq. font. q. s. Colat. ℥iij. dissol. mann. sal. mirabil. ā. ℥iij. M. F. Potio.

Ex primâ catharsi duodecim Lumbricos mortuos dejecit; proximâ decem; tertiâ quindecim; quartâ undecim; & denique quintâ sex alios, omnes rotundos, albidos, mortuosque, ac plerosque circiter novem pollices longos præter agmen quoddam, aut seminarium nascentium vermiculorum, vix formam perfectam adeptorum, cum primâ purgatione exclusorum.

Inter purgationes inducias hostibus dabam, & nulla anti-helminthica propinabam, sed solummodò statui, ut cochlearia iv. vini prioris Canariini, ad vires refocillandas, & corpus ab ulteriori putredine conservandum, bis in die pergeret haurire. Tum demùm consului, ut incolumis, ægritudinisque omnis expers, aëre rusticano se reficeret; utque post intervallum duarum septimanarum de Electuario sequenti lingeret cum bacillo glycyrrhizæ, ad magnitudinem nucis juglandis, singulis matutinis, donec totum deglutiret.

℞. Semin. santonic. integr. ℥j. mell. commun. ℥ss. M.

Si incorruptâ valetudine denuò fruebatur, & à Lumbricis securus in posterum degebat.

Cùm verò *Sal Catharticum Amarum*, & *Sal Mirabile*, vires suas auxiliatrices in præsentî curatione præbuerint, atque in frequenti meritò jam sint apud nos usu, nec non primum illorum salium vulgò credatur esse verum ac genuinum sal ex aquis mineralibus purgantibus extractum, æquus & idoneus usus nullo modo, ut opinor, interpelletur, si demùm innotescat, *Sal illud Polychrestum esse sal Gemma, sive Fossile, aut Marinum*, in magnâ copiâ aquarum mineralium catharticarum coctum, crySTALLIZATUM, aut ad siccitatem evaporatum. Quanquam & magna pars salis communis, sive marini dicti, quo cibos condimus, est sal fossile in aquâ marinâ solutum, purificatum, & evaporatum. Aut aliter fit sal illud catharticum ex sale fossili, sive marino, similiter soluto, atque inter concrescendum instillando oleum aliquod Chymicum, putà Absinthii, &c. Nam varii sunt operandi modi,

modi, varii ejusdem ferè salis dicti cathartici saporès, juxtà opificum divetsam peritiam aut versutiam. Neque mihi quoquo modo persuadere unquam potui, à primo ejusdem salis usu vulgari, aliud id esse posse, quàm sal muriaticum arte alteratum; quandoquidem tam inexhausta salis copia, pro minerali aquarum catharticarum habita, vili pretio passim suppetat, & cùm tam exigua illius quantitas ex aquarum destillatione reverà suppleatur.

Quinetiam tametsi Curiosi facilè conjiciant, neque omninò dubitent, nitrum, alumen, vitriolum, aliaque salium genera; ex analysi aquarum mineralium exquisitâ, quam destillatio illis suppeditat, se invenire, ac detegerel; tamen rarissimè aliud illorum principium salinum, aut causam falsedinis generalem comprehendere fas est, quàm sal Fossile in penetrabilibus terræ conclusum, & cujus mineras subterraneas rivuli aquarum præterfluunt, antequam earum scaturigines in conspectum nostrum prodeant. Et certè aquæ Fontium Mineralium falsedine majori, aut muriaticâ imprimis donantur, cùm sale præfato primùm saturentur, sed postea per colatorium terræ, quam præterlabuntur, paulatim expressæ, magis magisque dulcescunt: quemadmodum & aquæ ipsæ marinæ redduntur etiam dulces, per intima terræ, lege naturæ Circulatoriâ, circumfluentes. Sic sal marinum in terrâ fit fossile, ut fossile in mari fit marinum.

Ad hæc, aquas illas minerales catharticas, quæ minimum salis destillantibus præbent, & tamen purganti facultate eâdem pollent, quâ aliæ quæ plus ejus reddunt (quales sal perparcè suppeditantes sunt aquæ nostræ Espomenfes & Richimondienses, in aëre saluberrimo sitæ) sal noxium aliquod, præ aliis continere posse ad suspicandum inducor.

Denique falsedinem Oceani immensi ex nullo alio fonte deducere licet, nisi ex quamplurimis mineris salis illius fossilis, per alveum maris longè latèque distributis.

OBSERVATIO VI.

De Anginâ.

Conjux Excellentissima Præsulis amplissimi, & Archiepiscopi Reverendissimi, pietate, eruditione, & prudentiâ singulari maximè conspicui, Anginâ corripiebatur. Interiores laringis & faucium musculi phlegmone tenebantur, tumorque internus deglutitionem inhibebat. Os pariter illuvie phlegmaticâ & spumosa obruebatur.

Manè accersitus phlebotomiam in brachio instituebam, & paulò post enema emolliens injiciendum; quo rejecto, Domina insignis Linctûs insequentis cochleare singulis horis accipiebat. Notandum verò, si tumor e-

jusmodi faucium , introsum versum , omnem deglutiendi facultatem auferat , Cucurbitula sicca una aut altera colli spondylis affixa , ita musculos gulam , sive œsophagum , & guttur comprimentes retrò abducet , ut opportuna potestas detur medicamenti hauriendis , aut alimentis absorbendis , durante scilicet Cucurbitularum applicatione.

Rz. Ol. amygd. dulc. recent. flor. sulph. ā ʒj. cryst. tartar. pulv. ʒij. syrup. de althæ. ʒiij. ol. nuc. mosch. still. gtt. iv. sacch. cand. ʒij. M. F. Linctus.

Ex operatione medicamenti tam vulgaris , quod primas vias , citrà reliqui corporis perturbationem ullam , commodissimè expurgat , & alvi fæces , durante phlegmone , satis valide detrahit , rediens proximo manè inclytam Dominam ab anginâ perfectè liberatam inveni ; ac deindè post duos dies haustum catharticum propinabat , neque aliis remediis illi opus fuit. Hoc verò morbo laborantes iterum atque iterum audiui constanter asseverantes , quòd ex singulis cochleariis ejusmodi Linctus delibatis intumescencia sensibilibiter magis magisque decrescere solet.

Et profectò constat Sulphur tam vivum , quàm in flores sublimatum , in tumoribus illis faucium , hæmorrhoidalibus , aliisque pluribus præstantes , minimèque contemnendas continere vires. Annotandum solummodò universalis illius usui præcedere debere ; & corpora fluida , ac constipationis immunita prius reddi oportere , quò curatio , ejus ope , felicius cûsq; succedat.

OBSERVATIO VII.

De Variolis Anomalis , cum Morbillis consociatis.

Cum in Tractatulo priori noxam ægrotantibus formidabilem , ex medicamenti impensè calidis , Theriacâ putà Andromachi , Mithridatio , aliisque similibus , non modò in therapeiâ Infantum , verum & Adultorum febricitantium adverterim , & crebris usurpârim sermonibus ; Exemplum veritatis prædictorum maximè deplorandum , cum pace Superiorum , hîc enarrabo , quò melius tanti Exempli autoritas alios à consimili infortunio , si Deo placet , deterreat. Cùm primùm Serenissima Regina nupera nostra , immortalis coronâ jam fulgens in Cœlis , mihi statum salutis Serenissimi Regis exindè etiam Beati , exponere dignaretur , quo tempore honos immeritus tanto Regi serviendi mihi concessus est ; Regina , inquam , inter optimas , prudentissimas , dulcissimas , & maximè pias (omnium quæ hætenus ab exortu mundi , aut ubicunque vixerunt ; & à cujus præsentia nemo sine gaudio & alacritate unquam discessit) meritò annumeranda , de se ipsa narrare dignabatur : quotiescunque se admodum malè vale-

re, aut febricitare persentisceret, sibi morem invaluisse, ex consilio Clarissimi Loweri, tùm defuncti, ut Theriacam Andromachi, ad sudores acciendos, sub ingressum lecti, haud parcè sumeret. Cui ego tùm temporis, duobus circiter annis priusquam Variolis illis perniciosissimis corripere, ex quibus vitam mortalem cum immortalis commutaret: etsi veneratione non levi Delectissimum Lowerum semper prosequor, tamen mihi videtur Majestatem Vestram ex illo medicamento tam impensè calido extremum vitæ periculum subituram esse, quandocunque Vos detinebit Febris permanens & Continua. Nunquam enim vidisse contigit Febres magis exitiales, & Phrenesi furibundâ citius conjunctas, quàm in illis agrotis qui Theriacam Andromachi, Mithridatium, & similia calidissima Alexipharmaca, ineunte primùm Febre, inauspicatò sumpserunt. Idque nocuenti eò magis evenire solet, quò febricitantes fuerint temperamenti calidioris & sanguinei, & quo temperamento omnium optimo nemo Vestrum excellit. Porro Galenus, inquam, qui in laudes Theriacæ multiplices librum consultò scripsit, nuspiam ejus usum ad Febres Ardentes, sed ad Chronicos solummodò affectus, ac veneratos, laudibus suis celebravit. Attamen his omnibus, aliisque ejusmodi oblivioni dein traditis, & consilio celeberrimi Loweri memoriæ firmæ etiamnum inscripto, Regina summè admiranda, sub primum Variolarum insulsum, vespérâ primâ Theriacam Andromachi sumere placuit, atque sudoribus nullis juxtâ consuetudinem emanantibus placuit manè insequenti ejusdem duplicem quantitatem iterare, ad sudores frustrâ eliciendos, priusquam Medicorum consilium exploraret. Sic visum est rerum omnium Sapientissimo Gubernatori Reginarum optimam à populo indigno in Cælos derepentè transferre. Nunquam tot lacrimis, tam veris fletibus, tam universis luctibus quisquam mortalium, nè parens quidem dilectissimus à filio clarissimo, ante illam plangebatur. Neque enim tam Reginae unius jactura deplorata, quàm Regni totius clades & ruina tùm temporis videbatur contingere. Veruntamen dolorem acerbissimum quem tantæ calamitatis memoria semper refricat, multum mihi minuit, quòd scopulos illos, in quos naufragium fuit factum, ego indigitarem, & periculi futuri præmonerem.

Et quia nonnullæ Doctorum procul dissortorum, & maxime transmarinorum criminationes super hoc funestissimo casu fuerint in vulgus iniquè disseminatæ, tam quoad Medicos quàm quoad morbum; ad veritatem rei certius cognoscendam pauca quædam scitu non indigna, permissu Superiorum exorato, adjicere non gravabor.

Variolæ, quibus pretiosissima illa vita tam subito abrepta est, fuerunt omnium deterrimæ, ac summè perniciosæ; nimirum cum Morbillis consociatae, quasque Erysipelas in facie, Petechiæ, & Hæmoptysis usitatò concomitantur. Et Medicos id temporis advertebam insigniores, cum alii Variolas comparere, alii Morbillos contenderent, conjunctas fuisse morborum amborum vires, & quorum vim simul unitam me plus semel observasse, affirmabam. Quod quia nunquam à quopiam Autore, quod scio,

scio , litteris consignatum , neque à Medico forsan alio prius observatum; digressio hæc veniam facilius obtinebit.

De historiâ Variolarum illarum , ac naturâ penè Pestilentiali (quæ quantum ab errore isto Theriacali pendeat , facile est judicare) potui multa conscribere , sed ea breviter tantummodò perstringam. Die tertio morbi exanthemata in conspectum primum prodibant , cum tussi admodum molestâ ; atqui eâ facie erumpebant , ut Medicis planè dubium esset , an Variolæ certò forent , an Morbilli. Die quarto Variolæ in facie , ac reliquo corpore , sub propriâ & distinctâ formâ se ostendebant. Die sexto manè pustulæ Variolosæ per totum pectus in Morbillorum maculas rubras majusculas sunt conversæ. Atque Erysipelas , *Rosa* dicta , totam faciem intumescentiâ replebat , pustulis prioribus locum cedentibus. Illâ vespërâ , Petechiæ plurimæ latiores , & rotundæ , in fronte suprâ supercilia , & in temporibus aspiciebantur. Cùm verò maculas illas non fuisse Petechiales , (quas mox venturas ego manè prædixeram] verùm Sphacelatas ob nigricantem earum colorem , quidam Medicus Peritissimus asseveraret , proximo manè diei putà septimi , aliquot Macularum illarum phlebotomo Chirurgi celeberrimi , durante Consultatione pungebantur , & sanguis ex illis effluens veras Petechias fuisse demonstrabat. Post mediam noctem diei sexto succedentem , & quâ nocte ipse pervigilabam , magna anhelitûs difficultas oborta est , & paulò post sanguinis sputum copiosum. Die septimo mictus sanguinis sputo ejus successit. Die octavo latæ Morbillorum maculæ in pectore permanebant , sed in artubus inferioribus , ubicunque fuerant pustulæ variolosæ , omnis illarum intumescencia prorsus evanuit , eæque in Maculas rotundas , pustularum magnitudinis æmulas , intensè rubras , & summè coccineas versæ , superficie earum lævi , & nequaquam eminenti , instar stigmatum Pestilentialium. Porro pustula una magna pure repleta , lato circulo coccineo Pustulam ambiente , instar cujusdam Anthracis , suprâ Cordis regionem à me tunc annotata est ; & sub quâ pustulâ plurimum sanguinis extravasati , aperto postea corpore , est repertum. Denique circiter mediam noctem animam sanctissimam , proh dolor ! efflavit.

OBSERVATIO VIII.

De Affectione Hystericâ.

AN affectiones muliebres Hystericæ dictæ , ab utero potissimum , an à ventriculo depravato , an ab aliis corporis partibus originem traducant ; an illæ aut ab utero , aut à liene , aut à pulmonibus , primariò vel secundariò pendeant , ego haudquaquam disceptabo. Controversias sanè Medicas levioribus ingeniis , aut quibus aliis per otium licet , facile est suscitare;

suscitare; lites dirimere, prudenterque judicare, res est gravissima ac laboriosa, doctorumque Professorum subtili acumine perquam digna, sed morbum propulsare salutaribus remediis, est omnium utilissima, summopere laudanda.

Mercatoris opulentissimi, qui paulò antè Munimentorum omnium Societatis *Africana* fuerat Præfectus, uxor eximia, annorum circiter triginta quinque, valetudine adversâ diu laborabat. Sed inter plures muliebres querimonias res præcipuæ notæ fuit, quòd ab horâ decimâ vespertinâ, quâ ibat cubitum, usque ad secundam matutinam, erecta in lecto assidere pallio suo cooperta cogeretur, neque interim caput pulvinari incumbere possit, metu strangulationis deterrita, à flatibus fursùm elevatis. Cùm Narcotica somnum nequaquam inducerent, quin eum potius arcerent, & perturbarent; cùmque Chalybeata, aliaque varia à Medicis præclaris antea præscripta, constitutioni tenerrimæ plurimum obesse putarentur, equidem consului ut Bolum sumeret cubitum itura, superbibendo cochlearia quatuor hujusmodi Julapii.

℞. Confer. flor. borrag. ℥ij. castor. opt. ℥ss. syrup. caryophyl. q. s. M. F. Bolus.

℞. Aq. lact. alexit. ℥iv. puleg. rutæ ā. ℥ij. bryon. comp. pæon. comp. ā. ℥j. syrup. de artemis. ℥i℥. M. F. Julap.

Ex his tantum levamen protinùs sensit, tantam spiritibus pacem & requiem, ut in lecto decumbere non amplius dubitaret; & quanquam somno non ita repenti se componeret, tamen noctem facilem, flatibusque immunem, neque somno mediocri destitutam, in posterum traducebat.

Sed quia Pilulæ illi magis gratæ fuerunt, hujusmodi præscripsi, quarum unam aut alteram, quodcumque se malè haberet, si horâ decubitûs sumeret, nunquam placidâ & tranquillâ nocte Domina hæc postea carebat; neque à plus decem annis has pilulas in promptu semper habenti, necessarium fuit amplius confugere ad meum, aut cujusquam alterius Medici auxilium.

℞. Castor. opt. subt. pulv. ℥j. myrrh. el. galban. puriss. ā. ℥ss. croc. opt. ℥j. extract. gentian. in tantillo aq. gentian. comp. dilut. q. l. M. F. pilul. mediocres.

Non hîc silentio præterire possum, Narcotica foeminis Hystericis, ad soporem inducendum, non sine noxâ & incommodo sæpè exhiberi. Si quidem Hysterica propriè dicta, ut castoreum, myrrha, galbanum, assa foetida, & crocus, quamplurimis mulieribus somnum tutò & efficaciter conciliant; quando Opiata aut Narcotica, quantumlibet nocturnæ requiei capeffendæ sint dicata, præter alia mala & incommoda, eas mulieres insomnes agere noctes sæpè numero cogant. Inter omnia verò tempora, quibus Narcotica tenero sexui inauspicatissimè solent exhiberi, nullum mihi videtur magis infelix & infaustum, quàm illud *Puerperii* tempus. Et quanquam neque Obstetrices vulgares, neque Medici ipsi, in torminibus & vigiliis Puerperarum, Narcoticis audacter uti sæpè minimè erubescant, tamen persuasissimus

simus sum, sanam prius & firmam foeminarum multarum valetudinem, Narcoticis tunc temporis usurpatis præter modum sapissime lædi, depravari & præ aliis omnibus causis propterea in morbidum ac valetudinarium statum perverti. Hinc igitur illis obstructions pertinaces, mensium suppressio, decolores & pallidissimi vultus, inappetentia, tormina ventris diuturna, melancholiæ, & nonnunquam mania superveniunt. Hinc deinceps labes morbida temperamento adeò clavo trabali infigitur, ut neque Chalybeatis, neque aliis quibuslibet possit in solidum tolli, ante proximum parturiendi tempus, quo sanè vera, & maximè opportuna crisis easdem sanitati pristinae restituendi rursùm redit, & occasio idonea errores priores corrigendi, si qua unquam, ministratur.

OBSERVATIO IX.

De Ventriculi dolore summo, cum Vomitu periodico conjuncto. Item de dolore Colico, ejusque tam Præcautione, quàm Curatione.

Illustris Domina ventriculi dolore gravissimo, & vomitione importuna, alternis ferè septimanis, redeunte, per plures annos laborabat. Medicos nostros celeberrimos diu, frustra que consuluerat, qui venæ-sectione, emeticis, narcoticis, chalybeatis, aliisque minimè contemnendis remediis ventriculo affecto subvenire nitebantur. Post multam operam, ut accidit, inutiliter locatam, ego Vinum sequens Medicatum præscripsi, quo primùm sæpius, postea rarius, iterato, ab omnibus symptomatis ventriculus ejus tandem liberatus est, & absque aliis medicamentis Domina præfata convalescebat.

℞. Summitat. absinth. Rom. centaur. min. ā. M. β. flor. chamæm. p. ij. rad. gentian. incis. ʒij. Infund. frigide per xij. horas in vin. alb. ℥iij. Colatur. rursum infund. frigide rhei el. incis. ʒx. rad. calam. aromat. pēon. mar. sicc. ā. ʒiij. enul. campan. ʒiβ. semin. coriand. ʒj. M. Coletur tantummodò inter utendum.

Præclarissimus Bateus noster in adversariis suis privatis (quorum syllogem magnam mihi contigit comparare, nempe de singulis corporis morbis, à capite ad calcem, observationes omnes complectentem tam suas, quàm alienas, quas in communi hominum consortio annotare solebat) præscriptum tradit, quod in Pharmacopœiâ Bateanâ, à Shiptono, Pharmacopolâ non ita pridem peritissimo, typis mandatâ, describitur sub titulo Tincturæ Rhabarbari; & cujus notitiam Baro illustrissimus G. ventriculi dolore, & viscerum torsionibus, ante ejus usum, diu excruciat, à Phamacopolâ suo, quadragintâ librarum monetæ Anglicæ pretio acquirebat, cum nullo ære à Medico suo ordinario id impetrare possit. Nempe ejusdem ejusdem usu

Baro

Baro ille nobilissimus citò convalescebat, cui irrita priùs fuerant alia medicamenta. Hæc verò fuit formula :

℞. Rhabarb. elect. incis. ℥ij. uvar. passar. enucleat. N. 60. glycyrrh. ras. ℥ij. sacch. cand. ℥ss. aq. vitæ vel anis. ℥ij. Macerentur &c. F. Colat. Da cochlear. ij. vel iij. matutino tempore, quoties fuit necessarium.

Colicus dolor sic falsò nuncupatur, cum paroxysmus quilibet gravior sit semper Ventriculi affectus, non Coli intestini. Magnitudo Coli ampla facibus accumulandis est maximè idonea, ejusque plicæ ingentes eisdem retinendis sunt accommodæ. Sed substantia coli crassa & obtusa, quanquam flatus ex eo fursùm lati caput, ventriculum, aliasque principes corporis partes nonnunquam lacestant, in alvo putà constipatâ, tamen tantis cruciatibus, spasmissque progignendis, quanti Colicâ laborantes sæpissimè torquent, non videtur esse posse causa effectrix aut adæquata. Cæterum Ventriculo cruditatibus depravato, ac læsis ejus functionibus (cùm Culina sit totius corporis, in quâ scilicet cibi omnes coquuntur, comminuuntur, & in cremorem quendam, aut Chylum, conficiuntur ad futuram alimenti distributionem, corporisque nutritionem) morbi ferè omnes, & maximè colicus dolor, juxtà discrepantiam temperamentorum, & partium peculiarium imbecillitatem, sive nativam, sive adventitiam, diversimodè contingunt. Os, sive introitus ventriculi, insigni nervorum plexu cingitur ac munitur, spiritibus plurimis eò excubias primas facientibus, nè res noxiæ aut hostiles, pro amicis atque alimentosis, sine sensatione aliquâ, perturbatione, dolore, aut singultu ingruente, tanquam classico quodam, in castra ventriculi ampla admittantur. Tunica etiam ventriculi interior tota est nervea, ac sensationi inserviens, adeò ut, cum sæva aliqua tempestas in ventriculo oriatur, flatibus furibundis procellam suscitantibus, illicò fremant propinqui spiritus, facile in spasmos ruant, & tensiones, inflationes intumescantiasque maximè dolorificas cieant. Proindè ventriculus tùm ex fabricâ suâ, tùm usu, sedes propria, ac primaria, torsionum illarum molestissimarum, & sæpè perniciosarum, quæ in Colicâ excruciant, videtur stabiliendus. Certè Galenus, veteresque Medici sapientiores, ventriculum tanquam basin ac fulcimen penè omnis sanitatis considerabant, cùm Absinthiata in aquâ; si quando conjungeretur febricula, in vino si febris abesset, toties propinarent, ac si sola, instar omnium, salutem corpori imbecillo restituere ferè valerent.

Obiter Julapia hodierna, destillatione exorta, veteribus Medicis planè incognita fuerunt. *Aqua*, *Vinum*; *Ptisana*, sive hordei mundati decoctum; *Melicraton*, sive hydromel extemporaneum; *Οἶνομέλι*, sive vinum mulsum, aut mellitum; *Passum*, sive vinum passulatum, ex uvis siccis expressum; *Sapa*, sive vinum coctum; *Posca*, *Oxycratum*, sive acetum aquâ mistum, aquâ mistum, fuerunt omnia ferè Julapia, quibus majores nostri utebantur, in medicinâ administrandâ. An verò Julapia illa veterum, propter simplicitatem, sumptus parcimoniam, atque *εὐωπισίαν*, an ea hodierno in

usu, eò quòd magis gratificentur & gustui delicatulorum, & locupletum voluntati, præponi mereantur, sagaces, periti, probique Medici litem dirimant.

Quòd verò ad præcavendam Colicam attinet, masticatio frequens Rhabarbari ventriculum sic affectum præ aliis corroborat, cruditatibus onustum sublevar, flatusque illius discutit, antequam in procellam sæviorem denuò exsuscitentur. Dioscorides consulit, ut *Στομαχικοῖς ὡς ἐπὶ δισμασσομένου καὶ κατὰ πινόμενον, μὲνενος ὑγρῆς ὑπερφορίας*, ut ventriculo affectis rhabarbarum ita ut est, in substantiâ scilicet, masticetur, ac citrà sorditionem ejus liquidis immisti lentè deglutietur. Expertusque ipse eloquor, qui ditos paroxysmos Colicos, saltem unum & alterum, Iliacæ passionis ferè æmulos, quondam sustinui, eâque masticatione diu liber à levissimis protinùs evasi.

Paroxysmis gravioribus subito occurrendum est, neque segniùs agendum, nè enormes vomitiones motum fibrarum intestinalium peristalticum tandem pervertant, Iliacamque illam miserandam passionem inopinanter accersant. Sanè chronicis, levioribusque ventriculi inflationibus sæpè recidivis sedandis Tincturæ illæ superscriptæ Rhabarbarinæ, aut Rheum manducatum, Elixir Salutis dictum, ut & Mithridatium, Theriaca Andromachi, plurimæque ejusmodi alia sæpissimè sufficiunt. Quòd si Colicus dolor vehementiùs excruciet, immanisque oboriantur vomitiones, fecibus obduratis, viâque dejectionum prorsus occlusâ; post venæ sectionem, enemaque valdè salinum, ubi indicantur, cathartica laudano conjuncta paroxysmum tollere plerumque solent. Neque etiam exigui usus nonnunquam sunt, cum sal mirabile, tùm catharticum amarum, in aquis mineralibus soluta, atque iterata quousque vias inferiores aperire possint. Tutissima enim sunt hæc blanda cathartica, cum fortiora illa magis invalentia, bili ferocienti stimulos addentia, vires ægotantium, & maximè Melancholicorum nimis labefactent, Icterusque post se crebrò relinquant. Item, post universalia, corticis Peruviani pulverati minuta quædam quantitas cum laudano liquido exhibita, & in intervallis vomitionum toties iterata, si à Medico præsentè prudenter imperetur, curationem paroxysmi atrocis brevissimam quandoque complet.

OBSERVATIO X.


De Hæmorrhoidum fluxu immodico.

EXimia Domina, ac vidua, gracilis, & biliosi temperamenti, Episcopo admodum Reverendo mihi vicino convivens, nocturno tempore tantam sanguinis jacturam per Hæmorrhoides derepentè fecit, ut plusquam quatuor ejus libras adstantes æstimarent, ante meum adventum post mediam noctem, paucis horis deperditas. Et credibile quidem fuit permagnam vim sanguinis per sedem

dem, nimirum absque torminibus, tunc effluxisse, quoniam Domina præfata id temporis mihi narraret, sectâ tantummodò in brachio olim venâ, tantum furorem atque impetum sanguinem suum tunc exagitasse, ut in maximum vitæ discrimen conjiceretur, animamque penè efflaret, priusquam sanguis rapidè erumpens medicamentis variis sisti possit. Et si vena in brachio, loco patulo & medicamentis topicis exposito, illam in extremum vitæ discrimen ita inducere valuisset, quantò majus periculum in hoc casu immineret ex venâ ruptâ aut exesâ, in loco quo vas ipsum prorsus lateret, & quo nulla topica medicamenta partem internam affectam perungere possint! Postquam verò Domina languescens Sacrosanctum ac postremum Viaticum ab Episcopo illo Reverendissimo sumserat, tanquam rebus terrestribus quamprimùm valedictura, & in cœlestes regiones illicò migratura, (interim comparatis quæ in usum præsentem mihi videbantur comparanda jussi ut portionem spiritus vini rectificati in vase idoneo calefacere famuli, utque pannos laneos, unum post alterum, spiritu illo probè calefacto imbutos, ano agrotantis submoverent. Quo fotu paulisper usurpato, sanguis ita vehementer profluens penitus sistebatur, sine quocunque alio remediorum apparatu, atque extrâ omnem metum ægra protinùs constituta est. Spiritum verò rectificatum, tamen si summe penetrabilem, idcirco calefaciebam, ut fumus exurgens in venas internas ad suppressendum fluorem vi suâ sanativâ & corroborante ocyùs introiret. An verò spiritus Terebinthinæ in consimili casu pares vires cum vinoso habeat, de quo tanta merito celebrat insignissimus & peritissimus Chirurgus nostras Dominus Young, in Devoniâ artem Chirurgicam summâ cum laude, & cum multorum commodo exercens, neque disceptabo, neque, si experientiæ sit consentaneum, quicquam repugnabo. Fotui ex aceto in Hamorrhagiis externis multum tribuitur, pariter ac Oxycrato, Veterum *Posca*, sive aceto aquæ immisto & introsumpto. Eadem Domina ex tanto ac tam subitaneo sanguinis profluvio, Febre intermittenti Tertianâ deinceps correpta est, quæ cortici Peruviano facillimè cessit.

Porro autem observavi, fotum eundem ex spiritu vini rectificato, nonnunquam iteratum, pariter atque fotum ex aceto vinario, fluxum mensium pertinacem sistere posse, cum nulla medicamenta interna scopum destinatum attigerint, & cum adstringentia ac narcotica non ita tutò fuerint adhibenda.

Antequam hanc decadem Consiliorum dimittò, æquum videtur admonere, quòd præscriptorum in eis unum & alterum, quoad minuta quædam minoris momenti, fortè non fuerint ad amussim cum illis quæ multò priùs præscripseram; ideòque memoriâ, quantum penes eam fuit, in minusculis quibusdam suppleri. Sed summa rerum præscriptarum, undè Curationes recensitæ potissimùm pendebant, ubique, & omni ex parte, fideliter tradita est.



D E

L U E V E N E R E A.



IC morbus tam gravis & acerbus est; tam latè serpit, & perniciem suam undique spargit; tantis cruciatibus miseros plerumque opprimit; & pristina sanitas tam difficulter restituitur, ut ab annectendo quædam eò spectantia non potuerim prorsus abstinere. Primordia hujus mali quæ pudendis solis labem incurrunt, contemptui & ludicro habeant, si ita placet, ganeones & Belli nostri; & petulantibus facetiis; tanquam nugas & crepundia, ea excipiant; sed quandoconque aut prima illa inquinamenta aut succedentia, in sanguinem denudò transferentur, atque per totum corpus virus distribuetur, pœnas insipientiæ debitas illi abundè persolvent.

De origine hujus morbi ambigitur, an ab omni ævo, post homines natos, extiterit; an superiori ferè sæculo in *Europam* ex *Indiâ* Occidentali fuerit advecta. Multa sunt testimonia, aut saltem suspiciones non contemnendæ de antiquitate hujus Luis, quanquam tot ferè Regna non ità pridem contrà ejus Natales probrosos decertarunt, alterum in alterum illud opprobrium rejiciens, quot urbes olim *Homerum* sibi gloriôsè vendicârunt. Certè nomen ejus legitimum usque ad nostra hæc sæcula in tenebris latuit. Nec forma & figura hujus Monstri à prioribus Medicis satis clarè & distinctè sunt descripta, neque ante novam suam denominationem nisi confusè admodum cognita. Hoc autem proculdubiò scimus, plurima olim apud nos Nosocomia Leprosiæ recipiendis fuisse extracta; & multum fallor, si unica & singularis domus apud nos etiamnum maneat, Leprosiæ vulgò recipiendis peculiariter dicata. Porro Venerei contagii eadem semper causa tyrannidem exercuit, nempe vaga & promiscua scortatio; nullisque sæculis defuerunt meretrices infames, quæ corpore prostituto vilem quæstum facerent: *positâ* verò *causâ* ponitur etiam *effectus*, quemadmodum & *sublatâ* semper *rollicitur*. Quibuscunque enim in regionibus, quibuscunque demum locis, prostibulæ istæ, ac corruptelæ juventutis vulgares prorsus exulant, legumque asperitas scortationem omnem coercet, deest etiam unâ cum impuris scortis Lues hæc Venerea. Ubicunque verò lupanaria palam permittuntur, remisso magistratu aut dissimulante; vel ubicunque meretriculæ latebras aliquas fœdas securè nanciscuntur; eadem Lues cum horridâ malorum turbâ, cumque omni suo miseriarum famulitio; longè latequè dominatur. Atque, ut mihi quidem videtur, in utero impuro meretricum vulgarium, quæ plurimis viris, quantumlibet sanis, se se prostant & commiscunt;

cent, certò & naturaliter progignitur Lues, perindè atque in nido ex ovibus nascuntur volucres. Et quoniam corruptio optimi est omnium semper pessima, cur non ex feminis prolifici, & in tantos naturæ usus destinati, corruptione pravâ & incongruâ venenata illa Lues possit quovismòs propagari? Et nullus dubito, paucissimos uspiam esse scortatores, qui, quantumvis pœnas meritas aliquamdiu effugerint, non seriùs aut citiùs in laqueos illos inciderint, qui non turpi & funesto illo veneno fuerint tandem aliquando contaminati.

Sanè Lues hæc perniciosa est Supremi Judicis tremendum quoddam flagellum, instar ensis illius stricti capiti Damoclis inter epulandum impendentis, omnibus scortatoribus semper interminans, quod sapientes impuris amplexibus facillè deterrebit, quodque insipientes severissimis flagris aliquando cædet. Quis enim mulierosus certus esse potest, meretriculam qualemcunque sibi uni, ut videtur, stipendia facientem, non aliis pluribus fuisse priùs aut denuò fore pervulgatam, atque ideò obnoxiam venereo inquinamento, utcunque ista mendaciis suis, perjuriisque usitatis, pudorem aliquem comminiscatur?

Neapolitanus hic morbus vulgò nuncupatus est, & ab obsidione *Neapolitanâ* primùm ejus contagionem traduxisse ut plurimùm creditur, anno scilicet post *Christum* millesimo, quadringentesimo, nonagesimo tertio; cùm *Neapolim* castris suis circumdaret *Carolus* octavus, Gallorum Rex. Sed cùm rumor popularium tanta sit incertitudo, ut sapientes vix quicquam pro certo pronuncient, quod non manifestis & sibi notis testimoniis confirmatur; cùm aliorum morborum primus exortus in tenebris æquè permaneat; cùm ita constitutum sit rebus humanis, ut in singulis sæculis quædam continuò pereant, oblivioni tradantur, & alia quædam rursùm emergant & suscitentur; cùm virus Venereum in omnes ferè regiones totius orbis, quantum nobis innotescit, ab oriente ad occidentem, à septentrione, ad meridiem, jamdiu spargatur, & usquequaque diffundatur; cùm denique Medici aliquot gravissimi Luem istam infamem ante obsidionem illam *Neapolitanam* contagio suo virulento *Europam* jam invasisse constanter affirmant, sanè difficile est aliquid certi & indubitati in re ita obscura stabilire & discernere; quanquam antiquam Luis prolapiam admodùm apertè indicare videatur antiqua, ac permanens causæ existentia, nempe scortatio illicita, vaga, & promiscua, primordiis fortè rerum humanarum, aut saltem effræni hominum libidini, ac corruptelæ meretriciæ coæva.

Sed ut hanc rem paulò altiùs perscrutemur, *Hippocrates*, cujus autoritas apud omnes doctos plurimùm valet, libro tertio de Morbis Epidemicis plurima horrenda symptomata enumerat, quæ ad formam Venereorum quam proximè accedunt: ut, *pustulas magnas, & pustulas corpore universo erumpentes, maximèque caput impetentes, ulcera fœdissima circa pubem & pudenda, inflammationes Erysipelatodes malignas & depascentes, diarrhœas & cibi fastidia, tabes multas, aut atrophias, nunc sine febre, nunc cum febre contingentes;*

tes; carniū, nervorum, & ossium mutilationes ex decidentiā magnas, à carie præcedente, prolapsus partium abscessibus corruptarum, & denudationes femoris integri, tibiæ, aut pedis totius, prolapsus brachii aut cubiti totius, & omnium miserrimas carniū jacturas, cum pubem pudendaque malum affecerit: ichores ulcerum & abscessuum puri absimiles, & pure omni deterioris, capillorum defluxia fluxiones ad pudenda multas, dolores gravissimos cum vigiliis, ulcera oris serpentina, & tubercula tam interna quàm externa circa inguina, aut bubones, tubercula faucium, ulcerationes pudendorum, & similia, quæ quidem breviter tradit, & more suo conciso. An verò hæc omnia à Peste verâ, an à Pestiferâ hæc Lue oriantur, in utramque partem ut differant par est doctis liberum relinquere.

Quicquid verò de turpibus Luis natalibus sit statuendum, certè dolendum est maximè, Curationem tantæ Ægritudinis, omnes corporis partes, tam internas quàm externas, à capite ad calcem, polluentis, è manibus Medicorum doctorum & peritorum ita profugisse, Chirurgis, necnon tonforibus imperitis, ignarisque quibuscumque vulgò concedi. Quis enim tam fatuus & insulsus, quis tam illiteratus ardelio, qui non Medicafter in hoc morbo circumforaneus facile evadat, sine instituto, sine sumptu, & sine arte; qui non curationem Luis, aut saltem Gonorrhœæ infallibilem perficiat fronte polliceatur? Quales autem hi sunt Medici? Sartores ut plurimum & fabri, similesque artifices, popinatores inertes & decoctores, qui in officinis suis fidem prius labefactaverant. Quam infelix igitur & misera est Infectorum conditio, qui duplices sustinent pœnas, damnanturque tum atrocissimi morbi cruciatibus, tum rudis agyræ ignorantie periculosa! Quasi levissimi quilibet affectus peritiam Medicam jure efflagitarent, morbus verò maximè anceps, medullisque penitus infixus, cuivis illiterato possit tuto demandari!

Ut autem summum discrimen Lue Infectorum manifestius appareat, considerandum est, hunc morbum frequenter esse Proteiformem, & post primam ejus subjugationem, sæpè novas postea induere facies. Illud equidem facile adducor ut credam, propterea quòd tot tabidos, & atrophiam confectos, pulmonibus ferè intactis, nec nisi secundario læsis, viderim perire. Et nisi ex acuto aliquo morbo illos contigerit extingui, marcore & atrophiam vix intellectam tandem contabescere semper observavi. His lac Asinum, pectoralia, narcotica, & similia, primam venenatam causam nihil respicientia, ad supremum usque diem frustra exhibentur. Chirugi salivatione absolutâ, & mercede laborum acceptâ, integram sanitatem audacter promittebant; atque denuò ægrotantes, longe diversis symptomatis quàm prius affecti, nequitiam somniant de reliquiis fomitis venenati, aliquamdiu consopiti, & intus delitescents, sed sub novâ formâ revirescentis. Interim Medicus quantumlibet peritus, nihil causæ Venereæ facile suspicabitur, atque ægrotus partim ex verecundia, partim præteritæ curationis securus, de pristinis rebus oblivioni jam traditis nullam mentionem facit. Heu quan-

to igitur discrimine versantur hujusmodi ægrotantes, cum nec ipsi de causâ ægritudinis primariâ ne verbum mussitent, cumque Medici contrâ morbum incognitum, Andabatarum more, cœcutientes militent! Certè Autores nonnulli, magis emunctæ naris, veritatem horum suboleverunt, cum ita prudenter illi consulerent, quoties aut dolor Ischiadicus, aut Rheumaticus, aut alius valdè pertinax, remediis propriis & usitatis nequaquam cederet, ut ad Diætam sudorificam, è Ligno sancto, Sarsaparillâ, & consimilibus, tanquam ad sacram Anchoram confugeremus.

Ex his Luis reliquiis spretis, & aliquamdiu abditis, non solummodò pendet valetudinaria, & misella parentum, æquè ac aliorum scortatorum conditio; sed & hinc morbi aliquot puerorum tralatitii, & ferme immedicabiles, & quos nominare minimè convenit, nè nati insontes, viri tandem facti, contumeliam, mœstitiam, atque animi perturbationem aliquam exinde iñeritò patiantur. Quamlibet enim majus est reverà dedecus à vitiorum suorum, quàm natalium, turpitudine & infamiâ, tamen novi viros eximios & fortes, clarâ & illustri stirpe, sed illegitimè prognatos, qui præter modum dolore opprimebantur, quoties de natalibus suis spuris mentionem aliquam factam ex susurris clanculariis in comuni hominum consortio illi suspicarentur. Atque in eâ re major est Turcarum justitia & sapientia, apud quos nemo parentum culpam in filios iniquè transfert, & nulla est ignominia natis ex partu illegitimo prodiisse.

Porro statuendum est Luem Veneream esse morbum venenatum, & maximè deleterium. Et quanquam non ità repentè interficiat, ut ictus & morsus animalium venenatorum, tamen temporis aliquo spatio, modò longiore, modò brevior, vitam infectis certissimè adimit, nisi remediis propriis & salutaribus sanitati pristinæ tempestivè restituantur. Paucis igitur agamus de veneni hujus, cæterorumque naturâ, & breviusculâ comparatione. Inter alias notas sunt signa venenorum, insignis faciei totiusque corporis pallor, & extremorum perfrigeratio, quæ in Venereis sunt maximè conspicua. In venenis assumptis, natura materiam venenatam omni vi expellere nititur in superficiem corporis & partes externas, undè maculæ variae, papulæ, & exanthemata oriuntur: Similiter in Lue Venereâ prodeunt maculæ, interdum parvæ, lentiginum instar, interdum latiores; eæque modò rubræ modò flavescentes; & primùm circa frontem ac tempora, deinde caput reliquum, tandemque per totum corpus diffusæ; nec solummodò maculæ, sed & pustulæ & tubercula in cute erumpunt. Venenis per os assumptis, calidis dico & erodentibus, magnum exoritur incendium in faucibus, & ventriculo, atque intestina doloribus aut torminibus exquisitis cruciantur: Lue infecti faucium inflammatione, & paulatim exulceratione, semper corripuntur; ventriculus illorum sensim prosternitur, & quanquam artus dolorum sævitiam & atrocitatem utplurimùm ferunt, tamen plus semel novi, aut intestina, aut hypochondria eisdem diris cruciatibus affecta, iisque tempore vespertino recrudescuntibus, quos artus utplurimùm & magis re-

gulariter sustinent. Denique Venena propria sua & peculiaria medicamenta, sive Antidota, ut ritè expellantur, requirunt: Lues, nisi propriis & quasi specificis Antidotis pernicies ejus virulenta depellatur, vulgaria omnia pharmaca, & methodos omnes, quantumlibet doctas, solet aspernari.

Sed natura hujus Veneni est alia atque alia, tum secundum regiones magis ad Septentrionem aut Meridiem positas, tum secundum Temperamentorum varietates. Etenim in Hispaniâ & Lusitaniâ, de hoc morbo (sæpè tam mitis iste est illic) vulgò colloquuntur, quemadmodum nostri solent de Liene & Scorbuto. Siquidem illorum Medici ad febricitantes matrônas nobilissimas ac virtute prædidas accersiti, solenniter quærent, an Lue Venereâ laborent, sicut nostri de Catameniis, quanquam & verecundè interrogant, & in illis regionibus, ubi Veneni aliqua portio indefinenter perspirat, Infecti multi sese totam vitam hoc morbo comite satis placidè traducere nonnunquam posse, sæpè confitentur. Apud nos verò longè aliter se res habet, & hæc Lues ferocem & immanem tyrannidem exercet. Nullus hic symptomatum & cruciatuum finis, nisi aspera aliqua, aut diuturna mitior, medicatio interponatur, donec aut dolores contorquendo, aut ulcera depascendo, aut ichor venenatus ossa corrumpendo, miseris finem imponant, & laterum putridumque cadaver tandem abjiciatur, pabulum sanè ingratum, & vix vermibus acceptum.

Quinetiam juxta Temperamentorum diversitatem Venenum hoc dissimiles vires apud nos obtinet. Temperies Melancholica, & Biliosa ejus exterminationem ægrius sustinent, quàm Sanguinea, & Phlegmatica. Multò facilius restituntur juvenes quàm ætate provecti. Idemque est dicendum, de Scabie, Herpete, & nonnullis aliis morbis varia temperamenta affligentibus. Et sicut Temperamentorum differentia efficit, ut Cathartica longè dispares effectus obtineant; hoc corpore mitissimis medicamentis facile purgato, illo fortissimis ægrè cedenti; utque idem dejectorium medicamentum eodem pondere diversis hominibus exhibitum, in uno celerem ac violentam, in alio tardam ac mitem, & in alio nullam omninò operationem concitaverit: ità & de Venenis dicendum est quòd illa citius aut serius interimere soleant, non modò ex propriâ & innatâ vi perniciosâ, sed secundum fortio rem aut debiliorem repugnantiam naturæ ejus, qui venenum accepit. Nam opinio ista vulgaris ficta est & falsa, quæ *Indos*, ab iisque *Italos*, ita artem veneficam statuit calluisse, ut in statum diem, aut tempus prædeterminatum, sive fuerit septimana, sive mensis, sive annus, Venenatos omnes certò conficere possint. Natura enim unius quàm alterius, quemadmodum dictum est de catharticis, veneno magis se opponit, & lethale virus reprimit, aut frustratur.

Sunt qui Luem arbitrantur, fractis, & attritis senio viribus tyrannidem suam fermè omnem jam deposuisse, & ad interitum suum cum senectâ demum vergere. Eademque apud plures doctos sententia jam diu obtinuit, quandoquidem blanditiis verborum tam literati quàm aulici spe vana ductis nonnun-

nonnunquam se accommodant, & gratiam lenociniis solent sibi conciliare. Qui verò sic sentiunt, nosocomia hodierna paulisper adeant, aut Chirurgo probos ac exercitados consulant; videant ulcera multiplicia, cancrofa, & depascentia, tophos & gumata, ossium caries, & carniū putrilagines; videant tabes, lipothymias, cachexias, denique totam Pandoræ pyxidem ibidem apertam; exaudiant etiam horrendas miserorum execrationes, gemitus acerbos, & ululatus permolestos; tandemque dicant, an Venus egregiâ illâ mansuetudine mancipia sua hodierna excipiat; dijudicentque pariter, utrū Mars an Venus plures ex numero viventium tollat, uter denique illorum amasiorum exitium pejus & frequentius cultoribus suis inferat.

Quod ad Therapeiam attinet Luis, alii sine Hydrargyro, & nescio quibus ineptis Arcanis eandem audacter pollicentur; alii denique emeticis, & catharticis Mercurialibus, & Diætâ Sudorificâ intercalatâ, similibusque, venenum illud penitus subigere annituntur.

Medici fermè omnes, totumque Chirurgorum sodalitiū, uno consensu, Salivatione tanquam brevissimâ, & maximè efficaci methodo, Luis curationem aggrediuntur. Nec denegandum est cuiquam in Arte Medicâ mediocriter versato. Salivationem esse omnium Methodorum, quas hætenus excogitavit peritia Medica, maximè expeditam, atque efficacem, ad virus illud Venereum valdè obtundendum, & malignitatem ejus perniciosam abundè frangendam, si minùs ea valeat non rarò ad venenum istud penitus delendum. Certè in his regionibus Borealibus, frigoris prædominio obnoxiiis, ubi labes Venerea tantâ immanitate sævit, Salivatio præ aliis adhuc notis inducias maximè veloces, pernicipiei dilationem, & symptomatum omnium vehementium cessationem obtinet celerrimam; nec non in quibusdam infectis, & potissimū in junioribus, curationem perfectam aliquando complet. Sed si consideretur horrenda illa, terribilis & nonnunquam intolerabilis medicatio, tantis cruciatibus & periculis extremis stipata, saltem exoptanda est, & omnium votis exposcenda, alia jucundior methodus, tutior illâ minusque molesta.

Potentissimum, & efficacissimum Salivandi genus est id, quod per inunctionem Mercurialem excitatur; & quod solum, tanquam *dignum nodo cuneum* Sydenhamius noster præclarissimus laudat. Sed refert scire, atque contempleri, in quot vitæ discrimina Salivatio ista conjicit infectos; quot ex eâ solent vulgò interire, quàm horrendas capitis, fauciumque efficit intumescencias, suffocationem repentinam frequenter minitantes, & vix fræno manūs peritissimæ rectè gubernandas. Nōrunt quidem aliptæ quàm periculosas diarrhœas, dysenterias, lipothymias, in temperamentis maximè Mercurio repugnantibus, ista crebrò producit; sed aliam vix exercebunt artem, vix quærent aliptæ, nisi quam in tyrocinio à Magistris suis didicerunt. Tanta verò est in hoc Salivationis genere humorum fusio, tanta succorum omnium corporis sæpè exantlatio, ut nil mirum sit spiritus

vitales unâ dissipentur; & maximè si in hac terrâ, aliter felicissimâ, ubi Melancholia tantum obtinet imperium, complures ex tam rapidâ fluidorum profusione succumbant ac pereant. Quàm fugax scilicet voluptas acerbissimas sustinet sæpenumero pœnas! Quantâ curâ & industriâ Sirenum illarum veneficarum blanditiæ sunt ab omnibus fugiendæ, quicunque aut sanum corporis temperamentum conservare volunt, aut vitam longævam jucundâ lenique senectute finiendam cupiunt!

Porro si facultates Hydrargyri tantâ copiâ in corpus intromissi, ac sanguinis motu circulari omnes corporis partes pervadentis, velut in Salivatione vulgari contingit; si illius vires naturæ humanæ tam noxias, ac inimicas; si virus ejusdem nervis & cerebro peculiariter adversum, attestante id paralyti, & tremoribus frequentibus; si onus & tormina, quæ ventriculo & intestinis vulgò infert; si pallidissimum plumbeumque colorem, quem vultui impertit; si denique quòd à veteribus omnibus Medicis Hydrargyrum in catalogo Venenorum annumeretur, diligenter perpendamus: sanè Medico probo incumbit, quando duobus Venenis tam Morbi quam Remedii unâ convenientibus sit necessariò occurrendum, de Antidoto aliquâ propriâ, salutari, & excellenti, sollicitum esse. Et si tela ad hunc morbum ritè expugnandum magis apta & idonea unquam reperiantur, è Medicorum pharetrâ magis magisque denuò instructâ potius quàm ex aliorum quorumcunque sive armamentario, sive officinâ, ni plurimùm fallor, certò extrahentur.

Et quicquid delirum vulgus, aliique nonnunquam saniore judicio præditi, contrâ sentiant, sanè nescio, an quisquam omnium morborum qui miseros mortales solent exeruciare, judicium tenerrimum Medici periti & exercitati, potius quàm agyræ aut indocti alicujus requirat ac mereatur, quàm Lues ista immanis & venenata.

Quamquam verò Salivatio omnibus aliis Methodis ubique præcipuit, tamen notatu dignum est, quod *Julius Palmarius*, Medicus Parisiensis clarissimus, & eruditissimus copiosius disseruit, qui Magni illius *Fernelii* fuit discipulus & qui librum de Morbis Contagiosis tum doctè tum eleganter scripsit. Ille Salivatione, quantumlibet tunc populari, quantumlibet nunc vulgò usitatâ, *vix centesimum quemque* Lue correptum, perfectè sanari tradit, sed recidivo illos morbo, ex scintillis aliquamdiu consopitis recrudescente, nonnunquam citius, nonnunquam post plures annos affici, & languescere. Atque *alii*, inquit, *decies*, *alii duodécies* suo tempore Salivationem frustra sunt experti, tantâ interim cum doloris acerbitate, malorumque miserrimorum acervo, ut forti viro multò satius sit semel mori, quàm vitam morte pejorem sic proferre.

Ego itaque hæc animo diu multumque evolvens, nunquam complecti potui, quamobrem *Fernelii*, *Palmarii*, aliorumque Medicorum doctissimorum methodi tutiores ac jucundiores tam paucos sectatores consequutæ sint, & praxi hodiernâ ita proscribantur, nisi ob has potissimùm rationes:

1. Medici illi præclarissimi odio adversus Hydrargyrum nimis acri flagrant, propter noxas illas gravissimas, quas sæpius infert corpori. Et *Fernelius*, primus omnium Medicorum, curationem Luis sine quocunque Mercurialium usu interno, & fortè nimis temerè suscipiebat & palam pollicebatur; Amuletis suis selectis ac saluberrimis, Diætæ Sudorificæ, victui tenui & frugi, & catharsi intercalatæ solummodò confusus. Et certè propter ausum ac tentamen tantum, tamque salubre generi humano, si fortè minùs felix fuisset successus, omni laude dignissimus est egregius ille Medicus, quanquam in pestifero hoc morbo usus illius medicamenti periculosi, quod à * *Plinio* vocatur *Venenum omnium rerum*, summè necessarius nobis hætenùs videtur. Nam *malum ovum malo corvo* apprimè convenit. *Palmarius* autem Hydrargyrosi vulgari infensus fuit, tum ob perniciem ejus, tum propter extremos cruciatus, doloresque asperros, quos inuncti sustinere necessariò damnantur; tum denique quia proposita sua curatio per Guaicam & Amuletum, aut per Alexipharmaca sua Hydrargyro conjuncta, tutior fuit, & longè salubrior inunctione vulgari, sputantium vires exhaurienti. Quocircà alias Luem extirpandi methodos, tutiores, ac magis salutares, nec non jucundiores, licet nonnunquam paulò cunctabundas, fusè proponebat.

2. Chirurghi uno ore Salivationi præ aliis curandi modis facere videntur, aut quia præmiis donantur majoribus, isto modo valetudini prospicientes, summâ cum assiduitate, infectumque sub imperio quodam despotico vitæ ac mortis clanculùm in conclavi, remotis allis plerumque arbitris præterquam nutrice, tamdiu tenentes; aut quia durante tyrocinio nullam aliam æquè certam Lui medendi artem illi hætenùs didicerunt; aut quia aliam discere vix unquam volunt.

3. Quoniam Chirurghi technis suis hanc Medicinæ partem, quantum in illis fuit, tanquam sibi jure propriam utique arripuerunt & Medici, sive ob molestias tam fædæ curationis, sive allis negotiis impediti, illam provinciam quasi derelictam nimis neglexerunt, ac vilipendêrunt.

4. Quia curationes temporaneæ & palliativæ in hoc morbo, ut in aliis nonnullis, magis placent, ægrisque gratificantur, quàm Eradicativæ, quæ magis operosæ sunt, & exercitatione non parvâ egent. Quam ob rationem induciæ multorum gravissimorum Narcoticis derepentè comparatæ, & ægrotantibus sæpè magis placent, & Medicis nonnunquam præferuntur, quàm quæcunque alia, permanentibus interim aliquandiu doloribus, salutaris medicatio. His adde, Salivationem symptomata omnia Veneræ ita ut plurimum tollere, ut nulla recidivæ suspicio impræsentiarum restet, aut præmii procrastinandi ratio convalescentibus ampliùs appareat.

Quod ad impostores illos imperitos, turpissimos lucriones, ac nebulones vulgares attinet, qui sine Mercurio, sine quâcunque molestiâ, & nescio quibus *Arcanis* insulsis curationem brevissimam, nec non infallibilem,

omnibus Lue infectis cum insigni impudentiâ pollicentur, argumento sunt Bacillino quàm Medico digniores, & fascibus Magistratum aut collistrigio, prout veteratores perfidi, sunt potius castigandi, quàm disceptationibus, aut ullis rationum momentis accipiendi.

Denique tertium Lue Venereæ medendi genus, quod posthabita Salivatione solenni per inunctionem institutâ, & spretis deceptorum inficiorum fallaciis, cathartorum aut emeticorum Mercurialium vi & efficaciam, cum Diætâ è Lignis & Radicibus exsiccantibus, ac regimine debito, conjunctorum nititur, fusiores orationis copiam planè requirit. Sed nè tot impostores & agyræ dolis & insidiis suis hinc ansam aliquam avidè arripiant, vela dicendorum contraham, & pauca haud prorsus inutilia jam dictis adjiciam.

Et 1. notandum est, Ligna exsiccantia, gummi, corticem, & lignum Guaiaci, lignum Sassafras, atque radices Sarsaparillæ & Chinæ, tantum fere emolumenti naturæ humanæ conferre, & debilitatæ suppetias salutaris præbere, quantum damni & nocimenti Hydrargyrum corpori infligit. Sunt hæc salubria quædam hujus morbi venenati, licet imperfecta, pariter atque Mercurii Alexipharmaca, quandoquidem & citrà Mercurii auxilium opera & oleum nostrum sine fructu perdi solent. Et quanquam illa ex se nunquam apud nos scopum attingunt, Hydrargyro prætermisso, venenumque Venereum nequeunt penitus delere & extinguere, tamen robur nativum erigunt & fovant, palloremque huic morbo congenitum, in vividum ac sanum colorem certo certius immutant.

2. Notandum est Cathartica deleteria dicta huic morbo expugnando, qui vires corporis validissimas ipse infringit, & robur summum facile comminuit, quandoque minùs convenire, quàm mitiora & blandiora medicamenta. Et quoties fortior & validior requiritur catharsis, illa longè tutius obtinenda est, in debilibus scilicet naturis, sennâ, rhabarbaro, agarico, jalappâ, epithymo, polypodio, mannâ, hermodactylis, aut eorum quibusdam, additis etiam ceu stimulis, sale mirabili, cathartico amaro, polychresto, prunellæ, aut crystallis tartari; his, inquam, sæpè securius & commodius alvus movetur; neque plura eorum identidem repetita ita corpori imbellium nocent, quemadmodum scammonium, colocynthis, & helleborus, quæ aut ventriculum conturbant, aut intestina corradunt, gravibusque torsionibus excruciant, aut visceribus omnibus, partibusque principibus malignâ suâ qualitate sunt infensa.

3. Quanquam Mercurialia, & Hydrargyrosis, in omnibus temperamentis Lue inquinatis indiscriminatim vulgò usurpentur, tamen notandum est, corpora crassa, obesa, phlegmatica, & frigida, ab illis maxime omnium lædi; & constat injurias insignes, quas Hydrargyrosis talibus facit, vix unquam postea deleri, adeò ut non minùs discriminis à medicamento quàm ab ipso morbo illis contigerit. Atqui Sanguinea, Biliosa, & præfervido calore redundantia corpora, incommodo minore Hydrargyri usum paulò copiosorem sustinent, quàm aut priùs nuncupata, aut Melancholi-

ca Temperamenta. Etenim calida & sicca viscerum intemperies, contrariis quibus pollet facultatibus Hydrargyrum, corrigitur, emendatur, & nonnunquam insigniter juvatur, atque bilis ferocientis acrimonia plurimum demulcet.

4. Quotiescunque Lue jampridem infecti qui Ptyalismum prius subierunt, aut qui aliis modis ad tempus tantummodò sunt restituti, morbo recidivo è latibulis erumpente, aut novam formam sortito, turbas novas commovente; quoties, inquam, illi in atrophiam, neque à Pulmonibus tabidis, neque à Lumbricis pendentem, inciderint, quanquam Diarrhœa admodum violentâ exhaustantur, à Narcoticis quibuscunque abhorrendum est Medico, & restringentibus interdendum. Nam Malignitate venerii veneri intus delitescens sic imminutâ, & per sentinam corporis depositâ, propria Antivenerea optato eventu non diu frustrabuntur, & corpusculum strigosum deleteriâ Lue penè confectum, præter expectationem rursùm pinguescet.

5. Cum virus Venereum sit benè retusum ac fractum, omnisque symptomatum ferocia refrænata; at fomes venenatus haud penitus extinctus sub cineribus delitescat, novos postea tumultus suscitaturus: quemadmodum & in aliis nonnunquam casibus ubi symptomata anomala, doloresque vagi infirmos detinent, Medicamenta nervina, arthritica, amara, & antiscorbutica *salubria*, aliquamdiu usurpata, catharticis blandis identidem intercalatis, reliquias Veneni istius infracti tutò profligabunt, integramque tandem sanitatem præ aliis restituere valebunt. Siquidem talia corruptelæ humorum deleteriæ contraria, sanitati tuendæ, amissæque recuperandæ, vitæ producendæ, staminibusque vitalibus tenuioribus confirmandis apprimè conducunt.

6. Infantes à nutricibus lactantibus infecti, quanquam maculis, pustulis, ulceribusque scatent, quanquam & nocturnis illis doloribus erunt excruciiati, facillimè omnium restituuntur. Farina sarsaparillæ ferè insipida, saltem nullo gustu ingrato, aut fastidioso prædita, panatellis aut pulticulis suis, ut par est, *commista*, addito etiam, ventriculi gratiâ, santali citrini polline, nullâ pariter nausæa donati, catharticisque debitis intercalatis, renerrimæ ætati, ut lætè nonnunquam observavi, salutem perfectam reddidit. Quod verò infantuli à contaminatâ nutrice infecti, tanquam à Peste quâdam, sint ante inceptam curationem quamprimùm amovendi, non opus est ut admoneamus.

Denique 7. infectis, cum curatio modis mitioribus magisque benignis ac salutaribus quàm Salivatione illâ acerbâ & excrucianti instituitur, non est iis persistendum ad certum quendam ac determinatum dierum numerum, sed nunc brevius, nunc diutius, pro ratione veneni, naturæque reluctantis, remediis immorandum, quousque sub regimine debito venenum penitus subigatur, & symptomata omnia prorsus evanescant.

Antequam finiam, nequeo tacitè prætermittere errorem popularum insulsum, at valdè perniciosum, qui longè latèque inauspicatò increbruit. Nimirum didicit, aut fortè audivit ignarum vulgus, si quispiam infectus cum sanâ muliere mutuis amplexibus se commiscuerit, à labe omni venereâ se confestim fore tutos & immunes. Quot innocuæ virgines inter alias ex hoc stupido errore perierunt ! Sed cum sanguinem pervaserit virus pestilens, & viscera afflatu illo impuro imbuantur, credat etiam plebecula insipiens pari ratione, se clavam *Herculi*, quod ajunt, & fulmen *Jovi*, extorquere posse, & se montes excelsos, virtute cujusdam incantamenti, posse radicitus avellere & alioversum transferre.

Ut verò finem faciam, nonnullis videri possum nimis acriter perstrinxisse morbum Venere clementi prognatum, Deâ scilicet illâ amabili, cui tam Principes summi, quàm vulgus infimum, vota sua nimis frequenter faciunt, & cujus illecebræ pectora ferè omnium æstu quodam impotenti facile percellunt. Acrius, inquam, hujus morbi sævitiam perstrinxisse videar, quàm plurimi medicastri, qui eundem in postremis habere solent, ac pro nihilo, ut ajunt, ducunt; ut scilicet artis cujusdam exquisitæ, quam alicubi didicerunt, ostentationem gloriosè faciant, atqui ut reverà crumenas incautorum aliquando emungant, ut familiares suos opprimant, ad quæstum commodumque proprium iniquè referant. At verò longè præstat Medico probo, liberalibusque disciplinis instituto, verum dicere, quàm quæstu quovis duci, communique utilitati quàm suæ consulere. Modici rerum statûs, modò res sint benè partæ, nemini poeniteat. Nam pauca nonnunquam desiderium expleant, permulta animum rarissimè satiant. Paucitas rerum commodè benèque vivendo necessariarum facile suppletur, virisque bonis rariùs deest. Sed in superfluis accumulandis nullus vulgò finis gravissimarum sollicitudinum, nullum molestiarum maximarum tædium, rapinarum terminus; quasi dira illa execratio, aut fascinatio, avaros injustosque semper comitaretur, ut in opulentiâ inopes, in abundantia egeni vitam prorsus inquietam traducere damnarentur. Præcipiti cursu breviuscula labitur vita. Nec magna pompa impedimentorum necessaria est, ut amœna sit profectio, neque requiritur tanta viatici copia, ut breve iter conficiatur. Præclarè illis actum puto, quibus in benè agendo deponitur vita. Nec sapientibus lugendam esse corporis mortem, quam animæ immortalitas consequitur. Etenim tum demum nos verè victuros constat, cum è vitâ hâc excesserimus. Quid eò olim eximiè dixerit Philosophus, (pectore spe tumido, consolationis pleno, animoque futuris gaudiis admodum aspirante) in senectam vergens, & *Senectutem* ornatiissimè laudans? * Si in hoc, inquit, erro, quòd animas hominum immortales esse credam, lubenter erro; nec mihi hunc errorem, quo delector, dum vivo, extorqueri volo.

* Cic. de Senectute.

